

四庫全書

史部

欽定四庫全書

史部

宋朝事實卷

四至六

詳校官編修臣范來宗

編修臣程嘉謨覆勘

總校官降調編修臣倉聖脉

校對官中書臣張敦培

謄錄監生臣丁煌

欽定四庫全書

宋朝事實卷四

宋 李攸 撰

郊赦一

太祖乾德元年

案東都事略十一月甲子合祭天地于圜丘改元乾德從張昭議以宣祖配致

宋史十一月甲子十六日也此書失載月日

南郊禮成車駕將還宮有司請

乘金輅上顧侍臣曰朕欲乘輦可乎對曰無與典禮乃

改乘輦還帝御明德門肆赦前一日有司設文武百官

皇親及蕃國諸州朝貢使僧道耆老位于明德門外太常設宮縣置鉦鼓其日刑部錄御史臺開封府京城繫囚以俟及車駕還至明德門內就幄次改御常服羣臣就位皇帝登樓即御坐樞密使副宣徽使分侍立仗衛如儀通事舍人引羣官橫行再拜訖復位侍臣宣曰承旨通事舍人詣樓前侍臣宣敕樹金雞通事舍人退詣班宣付所司訖太常擊鼓集囚少府監樹雞竿于樓東南隅竿木伎人四面緣繩爭上取雞口所銜絳幡獲者

呼萬歲樓上以朱繩貫木鶴仙人乘之捧制書循繩而
下至地以畫臺承鶴有司取制書置案上閤門使承旨
引制案宣付中書門下轉授通事舍人北面宣云有制
羣官再拜宣赦訖還授中書門下轉付刑部侍郎承制
釋囚羣官稱賀閤門使進詣樓前承旨宣達訖百官又
再拜蹈舞而退赦文門下朕以三靈賸命五讓興邦躬
親罔憚于萬幾德教將加于四海屬歲時屢稔華夏大
同干戈漸偃于靈臺文軌皆通于象闕俗阜而南薰風

競刑清而貫索星沈仰觀則日月麗天俯視而龜龍在
沼加以物無疵癘民樂雍熙蓋玄穹垂祐于皇家非涼
德自臻于昌運由是攷百王之舊制緝千古之憲章墜
典必修無文咸秩潔犧尊而謁清廟被大裘以郊上玄
萬乘雲屯而在途千官星拱而就列公侯助祭共江漢
以朝宗鐘鼓在懸與風雷而相薄百靈効職羣后受釐
明德惟馨神心有答非烟塞望以呈瑞嘉氣浮空而襲
人民具爾瞻禮無違者乃回金輅乃御應門律且協于

黃鍾日正臨于甲子順三元之更始慶萬彙之咸亨而
又藩岳勲臣宰衡庶尹外達蠻貊內暨緇黃謂予歷數
在躬以應天廣運順其美謂予溫恭允塞以仁聖文武
成其功兼至德之隆名盡哲王之能事物議斯允予衷
莫遑宜覃曠蕩之恩用慰黎元之望可大赦天下云云
於戲崇德報功取天地無私之象青災肆赦推雷雨作
解之恩更賴中外大臣佐佑厥辟必使萬邦黎獻盡躋
仁壽之鄉百姓平章用致勲華之上布告億兆咸使聞

知其後郊祀遵用此制改是年為乾德元年宣制畢御
崇元殿百寮奉玉冊上尊號曰應天廣運仁聖文武至
德皇帝壬申大宴于廣德殿上壽號曰飲福宴

乾德六年改開寶元年十一月二十四日南郊赦文門
下我國家受天景福率土咸賓聲明洞照于萬方德教
咸加于四海風雨順而歲年豐稔干戈戢而刑政澄清
域中共慶于小康海外咸欣于至化朕顧惟寡昧祇奉
玄穹荷上帝之垂休致中原之大定遂發誠意再舉舊

章恭陳告謝之儀仰答自天之祐羽衛森羅而在野王
公肆覲而在庭六樂無不調五禮無不備躬奠玉爵陟
配紫壇具物薦誠神心昭格非煙塞望以呈瑞嘉氣浮
空而降祥宜與寰區同茲胥悅象闕既還于綵仗雞竿
大舉于鴻恩同玉厯之惟新與蒼生而共慶盡日月照
臨之內罔間幽遐極車書混同之邦咸均雨露庶成端
拱永洽可封可大赦天下
案宋史開寶元年南郊大赦
十惡殺人官吏受贓者不赦
後凡郊赦俱
大略倣此
改乾德六年為開寶元年自今年十一月

二十四日昧爽以前云云於戲皇王報本之義乾坤助
順之祥既舉彝章諒無闕政更賴中外宣力將相同心
保黎庶之又安致邊陲之寧靜扶持景運翊亮皇猷長
懷魚水之歡共樂太平之化布告億兆咸使聞知

宋史是

年南郊禮成上尊號曰應天廣運大聖神武明道至
德仁孝皇帝前乾德元年赦文載尊號此後多失載

赦文門下我國家膺上天之景命洽四海之歡心車書
大同聲教遐被爰自塵清五嶺浪靜南溟開萬里之封
疆致兆民之蘇息山川克復日月光華風雨順時歲年

大稔朕君臨天下道莅人寰致率土之同情自玄穹之
垂貺于是恭循典禮親執豆籩當愛日之迎長罄虔誠
而告謝羣后執圭而肆覲神郊備物以陳儀柴燎既升
乾光下燭瑞氣浮空而不散生民鼓舞以同懽宜覃作
解之恩用洽自天之慶可大赦天下自開寶四年十一
月二十七日昧爽以前云云於戲天地垂休所以祚開
泰皇王報本所以告成功盛禮行而人神協和慶澤流
而寰海胥悅文武列位將相具寮同心同德以逢時盡

節盡忠而宣力宜勤翊亮共致太平

九年

案宋史開寶九年四月庚子祀園丘此書失載年號并月日

太祖將幸西京正

月十三日詔曰定鼎洛邑我之西都燔柴泰壇國之大

事今江表底定方內大同祇適景靈用伸報謝乃眷西

顧郊兆在焉將飭駕以時巡躬展誠于陽位朕今幸西

京以四月有事于南郊

案東都事畧正月庚辰詔後月幸西京有事于南郊幸西京當

在二月而此書載正月十三日詔云今幸西京以四月

有事南郊攷宋史禮志正月詔以四月幸西京而太祖

本紀復作三月丙子

幸西京與此互異

及赴齋宮先時霖雨彌旬是日雲

物晴霽觀者如堵垂白之民咸相謂曰我輩少屬亂離不
圖今日復覩太平天子儀衛皆相對感泣赦文門下我國
家受命開基化民育物荷乾坤之垂佑致文軌之大同內
則朝政雍熙外則武功振耀洎兩川克復五嶺蕩平被聲
教于寰瀛納生靈于富壽惟有江表未息祆塵頃勞動于
六師尋廓清于一境數千里氛妖既殄百餘年生聚知歸
蘓其久困之民布以惟新之化非沖人之克又皆上帝之
儲休今者卜首夏之良辰就西都之正位備其燔燎靖乃

豆籩躬伸告謝之誠用達恭虔之志奠玉之盛儀既舉普天之慶澤方行宜覃曠蕩之恩用表混同之化可大赦天下云云於戲牲牢報本所以答天地之休雷雨行恩所以

洽華夏之慶御鳳樓而風雲助順

案宋史開寶九年四月庚子祀園丘迴御五鳳

樓大赦

揭雞竿而士庶同歡睠惟文武之具寮並効忠勤之

亮節佐我隆平之運實多翊亮之勞方切注懷更宜宣力

太宗太平興國三年十一月南郊赦文門下王者負宸居尊繼天垂統順三靈之睠命契萬國之懽心宵衣旰

食以忘疲卹物愛民而為念自臨宸極再易炎涼朝政
允釐嘉穀屢稔四海盡同于文軌九州重正于封疆顧
菲薄以何功賴穹昊之降祐爰循舊典親祀上玄獻琛
而率土皆來執玉而諸侯畢會風雲助順羽衛增華慶
皇祚之昌隆見禮容之繁盛而又王公庶尹中外具寮
同傾愛戴之心奉我龐鴻之號億兆之願豈獨在予宜
覃大賚之恩用洽可封之化可大赦天下自太平興國
三年十一月十五日昧爽以前云云於戲郊天祀地牲

牢已薦于至誠布惠行恩雨露均霑于萬彙灑渥澤而
瑕疵盡滌出縲囚而囹圄皆空凡諸有位之臣體我無
私之意更資忠力共贊皇圖寰宇克定于丕平竹帛永

光于千古

案宋史是年南郊禮成上尊號曰
應運統天聖明文武皇帝此失載

太平興國六年十一月十七日南郊赦文門下王者繼
統居尊握圖臨極法二儀而行化親萬務以忘勞兢兢
如涉于大川蕩蕩期臻于至化日慎一日于茲六年八
紘之文軌大同四序之陰陽不忒兵鋒偃戢年穀順成

蘇杭千里之土疆盡歸臨照汾晉一方之生聚頓愈瘡
痍邊陲載息于煙塵宇宙俱凝于和氣顧惟涼德享是
豐功蓋穹昊之降靈兼祖宗之垂祐爰伸大報特備嚴
裡被袞冕以陟圜壇薦牲牢而饗上帝而又中外列辟
文武庶寮復以徽名加于眇質尊崇之號念何德以克
堪億兆之心顧抑情而從徇祇膺典禮良用兢慙宜覃
作解之恩用洽普天之慶可大赦天下云云於戲玉帛
薦誠已陳于盛禮雲雷覃慶咸被于殊休効忠良者悉

與旌酬負瑕釁者皆從滌蕩百神受職萬國來同當景
運之昌隆嘉禮容之繁盛風雲薦瑞士庶同歡更資有
位之臣共贊無私之化各宣忠力永輔皇家布告寰區

咸令悉知

案宋史是年南郊禮成上尊號曰應運統
天睿文英武大聖至明廣孝皇帝此失載

赦文門下惟皇撫運樹鴻業于中區惟辟奉天表至誠
于大報既謹就陽之禮宜覃及物之恩用慶昌期式符
前典朕自虔膺寶運嗣守瑤圖九載于茲一心無怠雖
寰區既又敢忘于旰食宵衣而風雨弗迷屢覩于年豐

俗阜加以非煙甘露霏繼灑于人寰瑞獸珍禽馴擾
咸歸于御苑四塞之干戈自息八方之文軌大同集是
丕休匪由涼德斯蓋玄穹之所降鑒清廟之所儲祥朕
所以躬事裡燔告謝天地千官景從陪玉輅以供宸諸
侯駿奔仰玄壇而助祭矧乃文物大備聲名孔修當六
變以升聞荷百神之昭格純嘏之錫豈獨在予思與萬
邦同茲大慶仍改紀元之號遐均作解之恩可大赦天
下改太平興國九年為雍熙元年自雍熙元年十一月

二十一日昧爽以前云云於戲景運方隆荷乾坤之眷
祐彝倫式敘在刑政以交修更賴文武蓋臣方岳庶尹
各伸乃力共泰吾民庶令擊壤之謠不獨唐堯之代可
封之俗復追虞舜之朝凡爾含靈知予至意

四年正月二日

案宋史禮志淳化三年將以冬至郊前十日皇子許王薨宋琪請以來年正月

上辛合祭從之即此
正月二日辛卯也

南郊赦文門下我國家創業垂統

踰三十年禮讓興行車書混一外則五侯九伯立屏翰
之奇功內則三事庶僚罄股肱之亮節共贊無私之化

成茲不拔之基加以紫壇屢饗于天宗青輅早修于農
事既禮交而樂舉致遠肅而邇安內顧眇躬享茲介福
是用就上辛之良日薦大報之至誠乾坤既錫于鴻休
祖宗是崇于嚴配

樂東都事略淳化四年
南郊以宣祖太祖並配

八蠻景附咸

伸助祭之儀百辟靈從盡展陪鑾之禮觀士民之繁盛
望羽衛之駢羅思與普天同茲大慶自淳化四年正月
二日昧爽以前云云於戲郊天地以致誠明咸尊典故
法陽春而施德澤盡滌瑕疵中外遠播于懽聲宇宙徧

凝于和氣更資有位益勵乃誠展安民濟物之謀助旰
食宵衣之化庶俾照臨之內俱躋富壽之期咨爾萬方
咸知朕意南郊畢御乾元門下制曰泰壇燔柴國之大

典上辛祈穀禮有舊章祇見上帝祈福天宗

案此句下疑有脫文

無別本可校姑仍其舊

癸巳上賦南郊宿齋五七言詩六首賜近

臣乙未雨雪作立春日瑞雪詩三首祕書監李至言自

廟徂郊纖颺不搖羽衛如植升壇而星象炳煥訖事而

雲氣鬱興應門肆赦非煙可挹

案此句下疑亦有脫文

赦文

案宋史至道二年正月辛亥南郊此書失載年月日攷下原註宋白為禮儀使及問呂端云云按是

年宋白為禮部侍郎進翰林承旨呂端同中書門下平章事宋制禮儀使專命翰林學士為之白以翰林承旨為禮儀使故知此門下我國家千齡啟運百世其昌惟

載當在是年也

列聖之在天介鴻休于下朕自祇膺眷命嗣守皇圖

垂二十餘年居億兆之上域中四大常師古聖之言天

下一家幸接隆平之運遠肅而蠻夷率服時和而風雨

弗迷盡禹別之九州來修厥貢懋堯咨之四嶽咸建庶

官刑政于是相宣聲明以之大備夫何涼德集是不休

皆由九廟之儲靈實荷二儀之降鑒得不討論方策博採乎禮經祇奉郊丘興崇于祀事達孝思于清廟祈景福于上玄用薦精誠斯為大報百神効祉諸侯駿奔羅羽衛于康莊煙霞動色設宮縣于兩觀金石成文千官扈蹕以雲從百姓歡呼而雷動禮終嚴祀喜成昭事之心侯屬載陽廣布惟新之慶宜覃恩宥溥洽寰區可大赦天下云云於戲時當獻歲禮畢嚴禋祖宗之純嘏無疆天地之祥符有耀仰資玄貺敷佑蒼生更賴三事大

臣六師上將炳人文而宣教化揚我武以定疆場逮夫
庶邦冢君凡百執事咸有一德永孚于休俾我邦家紹
統前代盡善盡美不其偉歟告示萬方明知朕意原註是
禮儀使宋白奏曰伏詳儀注朝饗太廟皇帝先詣罍洗
後奠瓚其祀天地望先詣罍洗後奠玉幣上以問呂端
言得禮之中
遂從白議

二年十一月丙戌合祭天地于圜丘

案宋史真宗咸平二年十一月丙戌

南郊此書失載咸平年號今據詔中嗣
業三年等語攷之宋史知在是年也

以太祖太宗配

還御乾元門下制曰天祚明德民懷有仁惟景運之泰

階實昊穹之眷命太祖皇帝以武功定亂驅除八方四
登泰壇親行大禮太宗皇帝以文德柔服混成一統五
奠玉爵合祭二儀粵以沖人仰嗣丕業三年無改恭依
典禮之文百穀用成亟獲豐年之瑞退朝之暇內省于
懷未熟化源未成治定夫何涼德集是鴻休上由天地
之元符人神協贊復荷祖宗之餘慶輔弼宣功履春冰
而常積戰兢涉大川而詎知涯涘非惕厲不能繼先業
非精虔何以答上蒼必在乎假清廟而擁神休舉皇儀

而陳備物于以示昭報于以伸孝思爰當亞歲之辰躬
展事天之禮玉帛在筭金石在縣一陽生而寰海會同
九奏成而神祇下降禮無違者天必從之宜覃作解之
恩共洽無疆之祐可大赦天下云云於戲國容全盛天
仗旋班非煙散朱雀之街旭日麗蒼龍之闕歡聲雷動
喜氣雲從肆士庶之榮觀賴皇家之大慶更賴文武多
士將相蓋臣各竭忠規順成元化同心同德咸罄于嘉
猷無怠無荒不忘乎明戒同底于道不其偉歟布告萬

民咸知朕意

咸平五年十一月十一日南郊赦文門下禮莫大于事
天孝莫重于嚴父因心崇陟配之義垂訓懋翼子之規
自伯考建萬世之基聖父纘重熙之業莫不三年而郊
上帝九廟以饗神宗用薦精誠以伸昭報顧予寡薄獲
荷慶靈奉以周旋焉敢廢墜矧乃寰區底定黎庶幾于
小康農畝豐登稼穡呈于上瑞皆玄穹之所降祐繫列
聖之所垂休得不飭備物以告虔升禋燎而報本蠲吉

之祀廣至福于兆民曠蕩之恩宜大賚于四海可大赦
天下云云於戲天下之至大萬物之至繁雖勵力以自
彊願恭已而自治更賴藩嶽列辟股肱元臣暨禦侮之
羣才迨盈廷之多士咸盡忠而奉化各無隱于厥誠俾
予垂拱而仰成致俗一變而至道共臻多福永孚于休
景德二年十一月十三日南郊赦文門下朕自猥紹慶
基君臨寓縣奉若天道馴致時雍常念守位維艱纂圖
斯重納隍軫慮旰食視朝于今九年罔敢逸豫幸玄穹

之降鑒荷宗廟以垂休農祥荐臻邊候不警屬天正上
元之日陳吉土享帝之儀因得躬執豆籩祇見祖考牲
牢備物珪幣薦誠四海九州皆來助祭六蠻三獻斯用
降神仰景貺之自天慶蒼生之蒙福報本既行于盛禮
迴鑒乃御于應門萬國來庭集梯航而入貢九賓就列
觀書軌之混同宜大賚于中區洽鴻恩于庶品永言純
嘏豈獨在予爰稽肆眚之文式布維新之澤可大赦天
下云云於戲順天行慶俾渙汗以維均與物為春浹幽

遐而廣被偃草已臻于開泰垂衣方示于穆清更賴文
武具僚中外列辟體君臣之同德罄金石之純誠資政
教于和平納生民于福壽共扶昌運永享于休

案景德二年郊

赦以後大中祥符七年二月壬申以謂聖祖于鴻慶宮
恭謝南郊大赦又天禧元年正月辛亥以上聖祖尊號
于景靈宮南郊大赦今此書二次
赦詔俱缺無別本可攷姑仍其舊

天禧三年十一月十九日南郊赦文門下朕以仰欽皇
緒夙奉慶基自列聖之貽謀建眇躬之繼統兵戈銷偃
海域混同何嘗不日慎居懷時乘在御絕畋游而育物

戒服玩以敦風納民歸仁壽之區涉道究希夷之際撫
安四極賓延萬靈表下風以丁辰致彌文而熙載講求
典禮肅恭神人燕處穆清聿懷沖粹荷太清之孚佑示
秘籙以降祥靈運嘉亨景輿臨暨載聆諄誨逖悟仙源
勵翼彌堅欽修備至攷古先之盛則畢封禪之洪徽崇
尚真宗登隆妙號言念元良之嗣生知至德之方善訪
名山特開珍館祝壽昌之介祉見忠孝之存誠疊委寶
文愈昭殊應是用答顧懷于宮厚成禋享于壇壝薦玉

幣以告虔陳豆饗而蠲潔金匏協奏文物駢羅九賓相
儀百神受職天旂總集既彰祚國之休王澤涵濡宜洽
均禧之慶可大赦天下云云於戲展嚴恭之禮獲擁神
休覃滂霈之恩式符衆望諒周隆于慶賜增激勵于神
明更賴中外信臣文武列辟竭以忠勤之節傾其愛戴
之心協贊重熙永膺多福

天聖二年十一月十三日南郊赦文門下三載一郊國
朝茂典蓋所以報貺天地致虔祖宗盡欽翼之心膺錫

裨之福昊穹眷命三聖重光化無遠而不懷惠無幽而
不泐肆予寡昧纂是隆平端宸永思臨淵匪懼幸賴母
儀申誨先烈在民三事羣卿裨我以公道百工庶尹贊
我以遠圖政常敦本閑邪刑必蠲苛懲善邊陲撤候方
聘修歡東南之畝屢登陰陽之沴不作是用采甘泉之
曩制方委粟之前經度土就陽占辰亞歲豫祠真館虔
饗太宮乃陟嘉壇肅陳量幣羣司戒潔工器協恭瞻來
格于窈冥納降衷于高厚天清日潤禮備樂崇克伸孚

佑之文實荷龐鴻之賜宜均渙號溥及含生可大赦天下於戲積累之業存乎時涵濡之澤加乎遠邦家所著憲度甚明予惟遵行罔敢失墜班朝文武有位忠賢庶益蓋規以弼涼德勿休屢省稱朕意焉禮成輔臣皆進官宰相王欽若等固辭上謂曰郊祀慶成朕為卿等進官懇辭何也欽若等對曰臣等待罪近司獲陪盛禮幸甚復遷官秩益為忝冒上懇諭久之欽若等再拜稱謝而退

案宋史是年南郊禮成上尊號曰聖文睿武仁明孝德皇帝此失載

是月甲辰

案宋史仁宗天聖五年十一月癸丑南郊此書失載年月今以宋史及所載事跡攷之當

在是年也

百官集尚書省受薦饗景靈宮誓乙巳受朝饗太

廟誓丙午受合祭天地誓丁未上謂輔臣曰此三日百

官受誓禮當然耶王曾等對曰宗廟告饗皆沿郊祀之

事止當一日受誓今蓋循先朝舊制請俟他日釐正之

庚戌宿齋于天安殿百官宿齋于朝堂辛亥薦饗于景

靈宮宿齋于太廟大禮使王曾言

案宋史禮志是年郊後擇日恭謝大禮使

王曾請節廟樂云云今據此則在郊前二日宿齋太廟時也與宋史先後互異

皇帝執圭被袞

酌獻七室而每室奏樂章恐陟降為勞請節宮架之奏

上曰三年一饗朕不敢憚勞也卿勿復言

原註其後每親祀至版位

必遣內侍密諭樂卿令備其音節又以戒樂工云

壬子朝饗七室宿齋于南郊

癸丑冬至合祭天地于圜丘三獻終增禮生七人各引

本室太祝升殿徹豆畢赦文門下朕以紹膺端命祇服

睿圖六載于茲萬幾在念守大中之曩訓遵聖善之懿

猷被四表以宅心浹羣倫而從乂有所必應惟動斯和

歲事省成河流順復

宋宋史是年七月塞滑州決河故曰河流順復

此皆鴻靈

敷佑列聖顧懷乃底輯寧愈增惕勵奉先之道固竭于
精衷報本之儀聿循于舊典既卜郊而叶吉粵定位之
載嚴沿襲有初講求惟允格太宮而裸獻率迪肅雍類
上帝以燎熏並昭妥侑罄齋莊而備至荷盱鑾以居歆
矧乃真系垂謨夙展欽崇之禮玉虛攸館將申裒對之
文回寶睭以博臨介純禧而舉集顯無疆之大慶豈獨
在予霈作解之洪恩武均有衆可大赦天下於戲天人
交感緊默定之有孚中外胥歡諒寵綏而宣洽尚賴既

睦之宗戚同體之忠良暨諸邇臣逮夫庶士協一德以修輔廣四聰而必聞慎固基扃振明紀律無隱厥志用

恢永圖主者施行宣制畢百官稱賀上恭謝太后于會

慶殿

案宋史禮志是年郊後三日齋長春殿謝玉清昭應宮禮畢恭謝皇太后與此郊後即日恭謝皇太

后後三日齋長春殿又一日謝玉清昭應宮先後互異當以此書為據

內常侍贊引皇帝

皇帝自殿後幄詣皇太后前再拜跪奏曰臣禎虔遵舊

典郊祀禮成中外協心以歡以抃皇太后宣答曰

案宋史禮

志是年皇太后宣答曰皇帝德備孝恭禮成嚴配萬國稱頌懽豫增深云云與此互異

郊祀之社

與皇帝同之皇帝還內百官賀皇太后垂簾賜酒三行

丙辰宿齋于長春殿百官宿齋于朝堂丁巳恭謝于玉

清昭應宮

案宋史天聖五年郊赦以後天聖八年十一月戊辰合祀天地于圜丘大赦此書失載此

次赦詔無別本可攷姑仍其舊

是月壬辰

案宋史仁宗景祐二年十一月乙未冬至南郊大赦此書失載年月今以乙未冬至及三

宗並配攷之宋史知在是年也

上宿齋于大慶殿百官宿齋于朝堂癸

巳薦享景靈宮宿齋于太廟甲午饗七室又饗奉慈廟

宿齋于南郊乙未冬至合祭天地于圜丘以太祖太宗

真宗並配

案東都事略景祐二年詔以太祖為定配二宗為迭配皇帝親祀請以三聖並侑

赦

文門下朕膺天地之丕貺紹祖宗之慶基政典咸融兆
民祇若休祥狎應大田屢兆于豐年髦俊並生多士協
寧于景運熙平在旦燕翼有光諸侯盡賓納黎元于富
庶三公論道升遺逸于簪紳宣惟沖人克致茂實必修
報本之義以答上靈之心盛服展儀至日惟吉欽從謨
訓率致精明清廟肅雍既備陳于圭瓚闕宮靜恤復親
薦于豆籩被袞就陽燼柴定位嚴配並饗昭格于至誠

陟降交歡誕膺于純嘏念紹庭之垂裕顧受福之永昌
思與萬邦同茲大澤禮交樂舉既明嚴上之規雷動風
行宜覃渙汗之號可大赦天下於戲大事在祀聿從哀
對之文與物為春用穆好生之化更賴良弼賢戚維藩
文武蓋臣中外庶尹體恭肅以修輔本中和而在寬俾
敦孝友之倫咸躋仁壽之域翼宣王度永播時雍主者
施行太常禮院言南郊第一龕饗五方帝大明夜明神
州地祇北極天皇帝比歲上差司天監保章正攝事

且五帝尊神而獻官秩卑饗接非稱今詣第一龕以少卿監或正郎為獻官第二第三龕以員外郎壇下及內

壇之外以京官或保章正分獻從之

案宋史禮志景祐二年詔神州皇地

祇舊常參官攝事非所以尊神自今命兩省歲九大祀宰臣攝事者參知政事尚書丞郎學士奉祠與此稍異

大禮使言宗室詣中書受誓戒不至者六十餘員詔停郊廟幄位太常禮院言皇帝行郊廟之禮故事止設更衣幄殿而未有小次是以薦獻之際皇帝立版位以至于禮成未有所以裕主尊究恭肅也謹按周官朝日祀

五帝則張大次朝覲會同亦如之鄭康成謂大次所往所止居也小次既按祭退俟之處也引祭義周人祭日以朝及闇雖有彊力孰能支之是以退俟與諸臣代有事焉故說者以為祀昊天上帝亦張大次小次古者大次在壇壝之外猶今更衣幄殿也小次在壇之側今所未行按魏武帝祠廟令降神禮訖下陞就叢而立須奏樂畢似若不愆列祖遲祭不速訖也故吾坐俟樂闋送神乃起爾然則武帝坐俟容須引設近次與周官義符

今參驗前代謂宜設小次于皇帝版位少東每獻畢降壇若殿就小次俟終獻徹豆則復就版位至禮畢如此則奉神之意在久益虔執禮之容有恭無闕從之禮畢羣臣上尊號曰景祐體天法道欽文聰武聖神孝德皇帝三年七月己卯孫奭子瑜上崇祀錄二十卷詔送史

館

原註奭領太常做唐王涇郊祀錄紀國朝典禮未奏而卒

赦文

案宋史神宗寶元元年十一月庚辰南郊大赦此書失載年月日今攷之宋史知在是年也

門

下升陟配誠孝所以兼申擁休肆眚神靈于是交豫

朕奉承丕厯欽率先謨永惟置器之重浩若涉川之廣
託在尊極弗敢遑寧幸席成規寢尋至治而疆陲賓款
歲物順繁民罔時恫政克用乂斯皆昊穹開佑之貺宗
祏燕詒之謀幽贊于茲朕將何力內循涼寡期保顧存
是用圖講舊章迭修大報被飾壇兆豐潔染盛虔會迎
長之辰躬陳合祭之典至于前獻道祖歷祿廟昭案自真宗
以後凡南郊前必先饗景靈宮及太廟奉慈廟竇元元
年十一月戊申享景靈宮己酉享太廟及奉慈廟故曰
前獻道祖
歷祿廟昭蓋經禮必先之文庶哲王能饗之義措事之

日備物有嚴百執駿奔二聖參侑獲率強力以底盛容
居歆在上降鑒如答迪拜昨之吉敢曰余勤沛崇朝之
澤方思衆共再念嚮徇羣議許加徽稱深揆浮實之華
如乖克己之訓宜因冠號俾易建元顧無專享之福更
示惟新之命可大赦天下於戲逮下之慶方與物而皆
昌屢省之恩冀後天而攸奉尚賴三事庶尹列辟衆司
交輸乃誠躋格鴻化茂對乾施永孚于休禮畢宰臣張
士遜等五人上表加上尊號寶元體天法道欽文烈武

聖神英睿孝德皇帝

案宋史是年南郊禮成上尊號曰寶元體天法道欽文聰武聖神孝

德皇帝不載去英睿二字此書聰武作烈武當以此為正可證宋史之闕訛

上屢卻之謂士

遜曰唐穆宗云強我懿號不若使我為有道之君加我

虛尊不若居我于無過之地朕常愛斯言卿等亦宜體

此意士遜等懇請不回上不得已至二十九日下詔惟

不稱英睿二字餘允其請右司諫韓琦以京城內逼郊

祀數月盜賊公行輦轂之下宜有禁暴之法請南郊前

一月降敕開封府約束強盜罪至徒并折傷人以上如

犯在赦後母得以赦原其竊盜賊重者奏聽裁從之
康定二年有獻議者以西事未寧欲權罷郊天上以為
不可至十一月二十日南郊畢肆赦門下朕誕膺寶命
嗣守鴻基荷上靈降監之祥奉列聖紹庭之憲撫寧典
運司牧黎元慎保盈成之難思隆久大之業祇勤抑畏
垂二十年何嘗不中昃勵精幽微博聽慮一夫之不獲
期百志之惟熙務湯盤之日新致禹疇之時若至于秉
慈儉之訓絕游畋之娛器物屏雕文之功刑政革煩苛

之弊雖未臻于淳古庶無怠于始初幸以諸夏謚清百
嘉彙茂民涵豐楙之樂物違疵癘之傷玉燭四時蕭勺
羣祀斯皆三神之所孚佑九廟之所撫綏宜絜眇眇之
躬克召穰穰之福是用順攷聲名之典寢尋禋燎之儀
祓飾壇壝祇薦瑄幣揆天元景至之序定國陽郊見之
儀皇穹后祇酌降瞻饗之原藝祖文考毖陳升侑之嚴
本陶秸以致其誠合羶薌以達其氣望秩羣祀懷柔百
神異精意之獲伸美備物之能稱若乃首趨真館前謁

太宮肅修裸獻之常罄茲優愷之慕所以因昭事之大
述追孝之恭交集盛容克成美報禮由衆舉慶靡專承
當天地並貺之仁聿均大嘏法雷雨作解之施用霈醲
恩仍建號以紀元美受釐而布度可大赦天下宜改康
定二年為慶厯元年於戲謹漢時之親祠茲為大事體
虞書之肆眚所重好生許清多辟之流咸沐維新之澤
尚賴臣鄰同德官尹修方協進忠規允釐庶績丕格至
平之治共酬純錫之私初設有小次壇下又設褥為黃

金史卷一百一十二
卷四
道屬之神位至是上不御小次徹黃道改拜褥用緋以
盡恭肅之志

慶曆四年南郊御札敕内外文武百僚等朕荷祖宗之
謀託黎元之上日慎夕惕罔敢怠遑故嘗六款圜丘祇
見上帝今賴天之福浹宇以和雖右鄙留屯南方薄稔
已加撫綏期底靖安匪云交修思有昭報聖則能饗誠
慙于寡德祭不欲數既及于三年通奉先規講求多物
愜聞列聖之袷哀對明靈之臻況祈祉下民弗為專美

在國大事其敢憚行朕以今年十一月二十五日有事
于南郊咨爾攸司各揚乃職凡于供億毋俾煩勞應諸
道州府不得以進奉為名別行科率比者多緣嚴配加
上徽名止循率額之常徒為薦誠之累且應神以實何
用虛文與禮之奢不如寧儉其文武百官僧道父老等
不得因郊祀上表請加尊號永言有衆宜喻先庚共獎
至虔以副朕意故茲札示想宜知悉郊祀赦文門下朕
聞為國莫重于祭報本莫尊于天禮不欲至于煩類當

三歲物無以稱其德是竭至誠比者原田有秋辰緯澄
畧地數見寶蝗弗為災闕輔簡餉與之調羌夏露懷徠

之請間遣近輔分慰三垂

案東都事略慶歷四年夏元
昊稱臣命范仲淹宣撫陝西

河東富弼
宣撫河北就恤邊吏之勤無重編氓之困亦克用又方

致小康朕用欽荷顧存謹修裡類抑止貢奉之費裁節

供帳之勞前敕攸司毋加徽稱雖微有善之讓姑底事

神之恭且復稽參典文改告茲諡

案東都事略是年十
一月改諡真宗五后

尊諡從真聖之尊統貫乾德之舊章既款殊庭遂見清廟

叶長日之嘉會祇靈壇而順享皇穹后地之合藝祖神
宗之配六變而樂備三獻而禮成煬蒿煙于太霄達燿
火于羣祀兩儀洪洞萬瑞紛綸斯固足以表上帝之眷
懷罄沖人之明察又念乃文乃武有壬有林或奉引掃
除或侍祠顯祖八屯擁衛之格九州獻力之常共贊眇
躬克成烝祀美不專饗命則惟新用推多福之祥肆為
兆民之慶可大赦天下於戲明德惟馨已回蓋高之鑒
與衆更始誠慕列辟之良矧曰如台敢云自暇益當居

降祥之地而懼其咎席已安之勢而念其危弗徇非彞
弗為無益建中道以臨總渙大號而胥歡嘉與羣元共
臻斯路

慶曆七年十一月二十八日南郊赦文門下朕嘗博覽
載籍詳觀古今每資取于典彞用昭施于政教且夫大
事在祀所期奉而益恭讓德于天必欲善不自處斯皆
垂芳簡策作範邦家歷世相因百王不易在沿革而雖
異諒稽參而靡渝故假廟致虔掃地尚質實奉先而嚴

配取報本以貴誠粵自繼承逾茲二紀遵述詒謀之訓
企及欽明之風慎持守于盈成念懷柔于遠邇萬幾之
務罔怠于旰宵含生之倫冀登于富壽尚兢虞于隳戒
彌鑒省于昏荒治格隆平物無疵癘制作禮樂敢謂其
時協和人神當成厥事是用虔修絜祀參講禋儀抑菲
德之徽稱增先皇之顯謚案東都事略是年
加上真宗尊謚祇見觀德
之室嚴禋定位之方園壇載陞長日協吉順攷舊典傾
竭精衷九州獻力以惟寅百神受職而咸秩紛紛之貺

仰降于高穹曠蕩之恩宜覃于率土可大赦天下云云
於戲惟聖饗帝益罄于齋莊惟德動天敢忘于惕勵尚
冀祖宗垂祐輔弼協謀繫維城親懿之賢暨衛社忠勞
之士百工庶尹咸一乃心共贊昌期永臻皇極

十一月四日南郊赦文

案宋史仁宗皇祐五年十一月南郊大赦此書失載年號今以

下太常禮院議三聖並侑致之宋史知在是年也

門下燔柴報本崇經禮之親

郊渙號宣恩廣春秋之大旨朕肅膺統業寅奉政機未
昭厥塗猶涉淵水荷乾祇之數佑賴宗社之擁全治克

用平思無不服茂息生齒屢登康年蓋先烈之累仁省
眇躬之何德比舉秩于元祀用答揚于靈休三紀于茲
涓衷敢怠自合宮之訖饗即陽位以薦誠申命道司詳
稽舊典卜日南之長畧祠地上之園丘前詔諸儒攷正
雅樂蓋以遵達孝之述事昭盛德之流光適觀厥成升
奏羣祀庶德音之致相接于天人沿豫象之辭登配于
祖考率前期而戒誓復先甲以潔齋欽翼祖宮款見于
道祖肅僊在廟永懷于前人懼饗弗能臨裸惟惕紫營

未旦赤霄在望執事有恪備物無違蒙上帝以居歆奉
列聖之參侑蒼璧既奠朱燎以升惠我無疆肅然有感
欽惟天表之應誕錫壽康嘉與宇內之人均承貺施可
大赦天下於戲合祫大祀固靡神之不宗在霄羣方思
與物而更始尚賴左右承弼中外臣工秉德輔予竭忠
圖治惟休惟恤永底康哉太常禮院言奉詔再詳定三
聖並侑事伏以配侑之法前代不同古則一王而後或
兼配皆是變禮彌文廣申誠愛也國朝景祐二年曾下

詔書今次郊禋三聖並侑其後以太祖定配二宗迭配
明堂大禮亦三后並侑今陛下濬發德音欽明大孝況
是本朝舊制已再躬行于義無爽故下詔曰王者因郊
反始無大于躬親本孝奉先莫尊于主侑且明堂之配
已著于定儀而景祐之文蓋存于甲令雖協事親之愛
猶慎緣情之舉再諏羣議述攷舊典皆以謂祖宗功德
宜對越于上靈文昭武烈亦無嚴于祀位息民昭德定
保永圖自今南郊三聖並侑布告内外宜體至懷

三年罷南郊九月十二日恭謝

案宋史仁宗至和三年改元嘉祐九月辛卯恭

謝天地于大慶殿此書失載年號以宋史攷之知在是年也

敕内外文武臣僚執珪

璧以事神嚴祖宗而配帝雖有國之常典亦因時而制宜朕承三聖之丕基撫萬邦之有衆儉于已思天下之民豐勞于心致天下之民佚罔敢怠忽庶幾治平而首春以來偶爽調適賴三靈敷祐百福來臻順以節宣獲茲康裕加以邊隅不聳風雨以時雖庶物之咸和顧眇躬而增惕是用稽先朝之成憲詢故實于有司即廣殿

之翼嚴擇靈辰之良吉式申昭謝以格純休宜用先期
俾茲誕告朕取今年九月內于大慶殿行恭謝之禮其
今年冬至親祀南郊即宜權罷所有合行諸般恩賞並
特就恭謝禮畢一依南郊例施行至日朕親御宣德門
宣制仍令所司詳定儀注以聞務遵典禮勿俾煩勞咨
爾多方咸體予意故茲札示想宜知悉至九月十二日
恭謝畢降赦門下朕纘繩基緒統御幅員周視萬幾僅
成三紀思守文之尤重念居上之至難或未明而衣或

既盱眙食惟正人是訪惟公論是稽恬然過勤舉不知
困比春云始平履成虧荷高明之博臨膺厚順之丕擁
宗社降福士民輸忠眇眇之躬適臻于綏又便便之政
率遂于講修雖屬水潦遘災河流移道

案宋史是年四月大水河決商

胡眷言方國成克安安邦經所繫朕力何有亶茲循省
彌用戰兢秋禴戒期農收畢務誕詢故事參繹前文約
郊壇之儀嚴路廷之制工師虔鞏物品晏清祇罄誠忱
潔清款見上以答乾元之開佑下以漸生聚之樂康寔

通明靈大示肝鬲宜與兆庶共均休嘉式覃渙汗之恩
仍易紀年之號以孚神貺以順物宜可大赦天下云云
初仁宗得疾議者以太宗至道年升遐乃深惡其年號
趣詔中書改之是歲以郊為恭謝天地改元曰嘉祐四
年十月詔罷冬至祀南郊十三日祫享

宋朝事實卷四

欽定四庫全書

宋朝事實卷五

宋 李攸 撰

郊赦二

英宗治平二年南郊御札内外文武臣僚等天地者生之本先祖者類之始故禮有報本反始而祀天地尊先祖于是乎致虔恭焉國朝之制郊以三歲而自皇祐癸巳一紀于今鑿與之行不踵乎經涂皇邸之設不嚴乎

大次交神之道豈不缺然也哉朕以冲眇之姿荷顧託之重巍乎王公士民之上凜乎宗廟社稷之寄日慎一日惟恐弗任而三靈眷懷億姓禔福天清日潤雷動風行嘉生汜臻氛祲蕩定固可以薦四時之和氣總萬國之歡心以報本乎天地而反始乎先祖也朕以今年十一月十六日有事于南郊咨爾攸司務勤厥職諸道州府不得以進奉為名輒行科率必循其故毋或煩民故茲札示想宜知悉敕文門下朕承祖宗之休託王公之

上繼嗣丕業誕隆慶基我仁考體道誠明率仁高厚躬履純儉天俾壽臧熙然億兆之懷隆于父母之愛禮樂明備制作成于百年書軌大同歡心達于四表憲度著明而可則軌迹夷易而可遵肆朕沖人適當大寶祗荷先訓仰繫母慈永念繼體之艱居有涉冰之懼日慎一日三歲于茲曷嘗不究皇極之建中順乾剛之正命登籲賢俊監循典刑未明以求衣中冕不暇食宮室苑囿之好或弛以便民鐘鼓管絃之音固不以足欲前日文

武多士中外羣臣連上封章求薦稱號朕以繼志述事
未有以揚緝熙持盈守成未有以彰休烈下之方以底
百室之富上之方以接神人之歡義所未安抑而不受
豈自以得勤民之意蓋將以洪修己之誠深惟就國陽
郊肇禋吉土振古盛節本朝上儀儲精迓釐欲止不敢
惟孝能饗庶幾與焉是以因黃宮之氣升迨南極之景
至躬執圭幣潔修粢盛裸薦清廟之廷燔燎泰壇之奠
侑以烈祖對越上穹于時祥景晏溫大圓精粹和氣充

塞積愷肅清茲皆諸神受福于懷柔有昊眷顧而饗答
發祥降祉豈獨朕躬之敢專洗心自新嘉與海內之均
慶可大赦天下云云於戲崇大報之禮有以達于誠心
覃渙汗之恩是用孚于至信期爾阜安之俗既臻恥格
之風尚賴忠藎揚庭明謨在服共勵勅天之志永底無
疆之休主者施行是年當郊上意未欲躬行謂韓琦曰
初服滿恐未當出琦曰大禮不可曠兼陛下即位未嘗
郊見天地力請行之故事郊廟讀祝冊官至御名必起

上至郊宮更衣詣壇下百官皆回班迎向英宗皇帝初告廟詔讀冊官母起及詣壇下又詔百官勿回班迎向以見事郊廟之精意也

四年英宗手詔放治平二年南郊赦前編管人罷陝西衙前配買修河木植而罷江淮近歲衙前後乞置村鄉酒場強率人沽酒者時上不豫猶勅輔臣即時施行之英宗郊祀習儀尚書省賜百官酒食郎官王易知醉飽嘔吐御史前劾失儀已肆赦韓琦以聞帝曰已放罪琦

奏故事失儀不以赦原帝曰失儀薄罰也然使士大夫以酒食得過難施面目矣卒赦之帝愛惜臣子欲曲全

其名節類如此

案東都事略及宋史俱不載是詔此可以補其闕

赦文

案此為神宗熙寧元年十一月丁亥南郊大赦詔也此書失載年月日永樂大典舊與上英宗事連

寫誤合為一今以宋史攷之英宗治平四年正月崩神宗即位踰年改元熙寧詔中有述遵無改再替于此等語故知當在是年也

門下王者祇適聖緒所以永無疆之休對越顯穹所以凝溥將之命朕惟列聖垂統盛德在天積累熙洽付畀冲眇夫以制作大定之丕矩在宥恥格之休

風夷易所存燕翼維允肆朕述遵而無改恭默以仰成
再恭于茲百度咸若是以羣生蒙福方內大寧稽人有
秋而屢豐遠夷稽服而慕義兵革靡試疵癘莫興蓋昭
天之功自上仁而已厚故佑天之澤迨下武而方深乃
眷太和實荷隆慶內惟寡德惟不克任粵稽拜貺之文
茲有就陽之祀報本反始事孰重焉夫恭之所隆不可
以恩揜禮之所闕尚貴乎義起矧乃真聖舊章著為成
訓措紳頤論折衷前經斷自朕心博觀輿議是用因一

陽長極之敘舉三歲親見之儀朝薦殊庭賓祿清廟而
後升禋燎于秦時合陰祀于桑祇昭假上靈配侑列祖
六樂備儔萬玉旅庭侯衛駿奔蠻夷聳觀至誠胥感方
交神而塞明祥祉來臻且日升而川至顧予非質敢以
專享思與黎庶同底日新可大赦天下云云於戲接三
神之歡惟禮可以致孝饗均兆民之慶惟刑可以示哀
矜茲朕一心期底于道尚賴股肱碩輔陪側蓋臣共勵
協恭之誠以格可封之俗

十一月二十五日南郊赦文

案東都事略熙寧七年冬十月己未合祭天地于園

丘大赦宋史作十一月己未致是年十月無己未此作十一月二十五日與宋史合可證東都事略之誤門

下王者欽崇神天嚴奉宗祏就郊以享所以詔天下之

恭假廟而烝所以教天下之孝洪惟五聖之烈

案此書不載熙

寧七年但詔中有洪惟五聖之烈一語其為神宗無疑神宗凡四郊其前後赦文俱可攷見故知此為熙寧七年詔也誕輯百王之文肆予冲人昭事上帝載念物無以

稱維一誠可以展大報之儀祭不欲煩維三歲可以述躬行之典協會康年之順道迎至日之長是用朝薦殊

庭裸將太室乃進登于陽時以裒對于皇穹合祛柔祇
陟配文祖祝燧告潔贊犧尚純大樂變音舞奏而諸物
至二精揚燎煙升而萬靈交方丕事之獲成敢蕃禧之
車享宜敷大號以賚多邦可大赦天下云云於戲意盡
精裡既秩宗祈之舉政施惠衍亶昭慶宥之行維時黎
元綏我德澤尚賴謨明四近忠藎羣材儀圖新美之功
勩相隆平之運同底于治永孚厥休

熙寧十年十一月二十七日南郊赦文門下國莫重于

祭所以作民恭之先禮無大于郊所以報物生之始朕
懋建丕命寵綏庶方夙寤晨興任大守重惟文武之謨
烈心罔敢弗承惟上下之神祇志罔敢弗肅聿修三歲
之祀稽用一陽之正嚴大路以備儀款殊庭而先享於
穆清廟怵惕以見祖宗爰熙紫壇明察而事天地推本
陟配升煙合禋裒萬靈而誠交變六樂而物至顧迄成
于鉅典敢專享于蕃釐渙揚予恩敷錫爾衆可大赦天
下云云於戲答三才之典無以稱德產之微均萬國之

歡有以知惠澤之至尚賴左右勵翼內外交修永孚厥
休同底于道

元豐六年十一月五日南郊赦文門下天者物生之始
非肇種無以極其誠親者民恭之先非假廟無以致其
孝永惟五聖之烈必躬三歲之祀顧循沖人嗣膺厯服
敢不祇率以時飭修然而禮意寢而不明樂文雜而未
正故刺六經之說攷諸儒之言緝熙曠儀是正鉅典奉
壘以款真宇裸鬯以享宗祊齋戒乎端誠之宮清肅乎

禮神之圓陟配烈祖對越穹昊于時維太常之旂備金玉之駕迺措大圭以為國之綬迺服大裘以放古之文欽柴之燎四施燭煬泰一圜鍾之樂六變皦繹崇丘孝奏而日月光靈游而風馬下顧獲成于熙事敢專享于蕃禧宜大澤之肆均與羣生而共慶可大赦天下於戲答三靈之介祉既秩于宗祈格四海之歡心在敷于惠術尚賴秉文之輔經武之臣相協厥恭同底于治布告遠邇使咸聞知其年遂罷合祭天地

案元豐四年四月詔自今親祀北郊

並依南郊之儀六年太常禮院上親祀儀並如南郊十一月甲辰冬至祀昊天上帝以太祖配遂罷合祭其北郊當時未行也

十一月十四日南郊

原註蘇轍郊祀慶成詩注云有司欲羔裘度用百羔上以其害物以

黑繒代之案哲宗元祐七年十一月南郊大赦此書失載年號以詔中復興熙寧故實核之宋史知在是年

也赦文門下朕承六聖鴻烈之休御千載丕平之運逖

觀歷代之治無右本朝之隆充塞乎協氣之流洋溢乎
頌聲之作然而重熙累洽所以應之者惟艱持盈守成
所以保之者靡易顧茲冲昧紹乃基圖永惟幾深罔敢

逸豫仰賴文母維持我家保佑八年之間申錫九疇之敘賓禮故老子惠困窮上順帝心下從人欲廣祖宗之遺澤蒙天地之隆康欽言肇郊躬行大禮念嘗再饗乎

穹昊未始祇事乎皇祇是用推本建隆之舊章復舉熙

寧之故實

案自元豐六年罷合祭天地雖定親祀北郊之儀未之舉行至是呂大防蘓轍等謂合祭

天地為是宜依熙寧十年故事設皇地祇位遂復合祭

執鬯以裸八室奠玉以合

兩儀嚴烈祖以配天洽百神而承宇于時禮行而誠意格樂變而祥光浮誕受三神之釐敢專四海之福宜均

博施溥宥羣倫可大赦天下於戲乾坤之元始生仰俯之觀象法以為羣臣之道以成覆載之功咨爾内外之

庶工咸罄文武之致用惟新厥德永孚于休

原註蘇轍詩注又云

上至太廟門降輅郊壇止百官回班去黃道褥皆祖宗故事去織特出上意

十一月二十日南郊赦文

案東都事畧哲宗元符元年十一月甲子祀昊天上帝于

園丘大赦此書失載年號以分祀南郊月日及赦文攷之當在是年也

門下朕保極以宅

師奉先而繼統駿惠先烈慎懷永圖躬攬萬幾于茲五載顧德不敏賴天博臨四夷咸賓萬邦作乂師于獻捷

案東都事畧是年五月破夏人于大沙堆

農扈告豐錫之珍符

案東都事畧是年三月成

陽民段義獻玉璽

授以神策嘉瑞紹至禋氛亟消豈眇末之克

堪寶穹昊之眷祐興言大報莫重禋郊是用遵昭考之

詒謀舉隆周之墜典稽協彝制發揮禋容未奉皇祇之

祀先嚴蒼昊之饗

案哲宗紹聖元年以張商英言合祭非古三年詔罷合祭議分祀南北郊

至元符元年十一月甲子祀圜丘遂罷合祭然北郊親祀終帝之世未克舉云

乘一陽之復習

三歲之祥即路寢以齋居至殊庭而朝獻廣牡肆祀初

假廟以詔虔欽柴宗祈遂升壇而謁款配侑烈祖對越

明神樂成繹純禮敬敷備于時乾端澄霽冬序晏溫靈
心嘉虔精意昭格師象山則孝奏天儀申命之休既昭
受于上帝歟時之福其敷錫厥庶民揚于端闈享我大
號可大赦天下於戲告成大事敢專享于蕃釐申宥肯
災宜溥覃于曠澤尚賴輔弼寅亮官師協恭共維太平
之基永底無疆之祚

建中靖國元年十一月二十三日南郊赦文門下朕紹
膺寶命祇遵洪圖躬勤儉以御邦本寬仁而敷政維先

訓是式維師虞是從永言繼序之艱克謹持盈之戒荷
皇天之降佑蒙列聖之詒謀方夏乂寧蠻夷賓服三時
不害六府孔修建皇極而王道明即康功而民志愜以
迪純熙之運以彰平富之風豈朕德之能勝繫帝臨之
下屬肇稱禋祀祇答閔休是用參酌上儀鋪昭曠典奉
神考恭行之志繹紹聖申講之文將歲事于皇祇先致
饗乎穹昊迺候景涓日飭躬詔虔裸清廟以肅將款圓
壇而拜享侑我烈祖秩于百神禮嚴欽翼之容樂備雖

和之奏蒼璧既奠紫煙具升于時乾象潔清靈心嘉饗
和氣洋溢景光陸離瑞慶大來俾緝熙于純嘏膏潤并
受用敷錫厥庶民豫建新元誕揚渙號可大赦天下於
戲潔誠拜貺永祈申命之休肆宥均釐時乃配天而澤
尚賴成德之彥正事之臣率黎獻以協衷欽庶明而懋
績贊我溥將之緒迄茲伴與之游以明年正月一日改
元為崇寧元年

十一月二十六日南郊赦文

案東都事略徽宗崇寧三年十一月丙申祀昊天

帝于園丘此書失載年號以月門下裸獻清廟所以承
日及散文致之知當在是年也

祖宗之靈裡祀紫壇所以答乾坤之貺朕駿膺寶命龍

受寵禧丕宣文武之光盡緝熙豐之典取士于學稽古

建官亮采百工庶幾三代凡厥成王之式率由昭考之

行而九廟垂休

案東都事略是年八月建九廟詔已桃翼祖宣祖廟並復

兩儀協佑

生民底乂年穀屢豐修德錫符上燦璣衡之政鑄金象

物下隆鼎鼐之基

案東都事略是年六月籍元祐黨疵人司馬光等刻石于文德殿之東

癘聿消雨暘咸若茲豈眇躬之能假時惟上帝之弗違

是用奠玉陽丘莅牲泰時嚴配烈祖對越皇天于時圭
景晏溫璇穹澄鑑二端立而禮無不洽六樂變而物罔
不興靈心載嘉精意咸享受茲介福豈予一人之敢私
錫厥庶民思汝萬邦而共慶我有渙號揚于端闈於戲
作善降之百祥既茂膺于純嘏惟天佑于一德可共翼
于丕平尚賴三事股肱百辟文武咸勵同寅之業永底
無疆之休

案東都事略徽宗大觀四年十一月丁卯祀
昊天上帝于圜丘大赦天下此下當別有赦

天今無
從攷補

政和三年十一月六日南郊赦文門下朕承列聖之丕
基奉至尊之休德繼志述事持盈守成躬攬萬幾茲踰
一紀荷皇天之垂祐浹函夏以底寧年穀屢豐雨暘式
敘羌夷請吏川岳効珍禹功無濫濫之災堯瑞告平成
之治永惟多祐誕集沖人屬三歲之親祠刺六經而定
制率時昭考欽修時祀之專若昔大猷盡正相沿之陋
迺齋居于路寢迺朝獻于殊庭得四表之歡心醴假于
廟乘一陽之至景大報于郊對越昊穹佑我烈祖陶範

象性犧牷貴誠奠蒼璧以禮神秉玄圭而拜貺器協商

周之制樂兼韶護之純

案宋史是年十月閏新樂器于崇德殿出古器以示百官紫

煙燎而燿火升靈光屬而風馬下禮儀既備知帝顧之不違福祿來崇宣朕躬之專享宜孚渙號溥洽羣倫可大赦天下於戲申命用休俾緝熙于純嘏配天其澤用敷錫厥庶民尚賴同德蓋臣秉文多士克咸勵翼永保隆平壬午上神宗哲宗諡號是年十月三日御筆手詔朕若古之訓惟天為大觀天下物無以稱之故先王以

類而求祀于園丘象其形莫以蒼璧象其色冬至之日
取其時大裘而冕法其幽而未有以體其道夫天玄而
地黃玄天道也上天顧諟錫以玄圭內赤外黑尺有二
寸旁列十有二山蓋周之鎮圭有法乎是祇天之休于
以昭事上帝而體其道過周遠矣將來冬祀可措大圭
執玄圭庶格上帝之心以孚祐于下民永為定制

案宋史是

年以十一月癸未祀昊天上帝于園丘先
一日壬午饗太廟因上神宗哲宗證號

十一月十日南郊赦文

案宋史徽宗政和六年十一月
己亥祀昊天上帝于園丘大赦

此書失載年號以敘文
致之知當在是年也
門下朕紹膺景命嗣守丕基尊

臨九有之師親攬萬幾之務翼翼敢忘夫寅畏兢兢常

謹于繼承躬宵旰之勤以圖天下之又軫淵冰之慮以

保天下之安屬者百穀順成五緯來敘干戈載戰罔圉

屢空元命之辰九支占南極之瑞誕彌之旦三山紀黃

流之清

案是年冀州三山黃河清宋史不紀其月日致徽宗以十月生此云誕彌之旦則當在此十月

可補宋史之闕樂作而羽鵠翔鼎定而慶雲集名山顯位斬封

禪者數萬人絕域殊方徠臣妾者十一國有邦之應于

朕豈功物生本乎天唯聖人為能饗人道先乎祖雖天子必有尊迪惟古訓之循實重國陽之報固嘗辨先王之吉禮庶乎革合祭之非奉上帝之徽稱蓋以正異名之失茲協豐年之屢載迎至日之長于時歌昊天成命之詩奏園鍾六變之樂奠璧以致蠲潔升烟以適高明克禋克祀而精意昭來假來饗而珍符下肆緝熙于純嘏以敷錫于庶民其播大猷周推曠澤可大赦天下於戲報本反始得萬國之歡心蕩垢滌瑕對三靈之蕃祉

尚賴股肱良弼屏翰舊臣益殫忠藎蓋之圖光輔隆平之
運同底于道永孚厥休

十一月十三日南郊赦文

案宋史徽宗宣和元年十一月乙卯祀昊天上帝于圓丘

大赦此條失載年號以赦文攷之當在是年

門下觀會通以行其典禮允符

昌運之隆美盛德而告于神明茲迪精禋之饗朕肇膺
駿命嗣守鴻業撫九有之嘉師開萬邦之壽域兢業克
艱于底又寅威罔怠于求端聿承燕翼之謀裒對博臨
之貺屬者道源闡教帝祉凝釐農扈載謠黍稷報千倉

之慶明堂御歷璣衡觀七政之齊氏羌款塞以咸賓

案宋

史是年六月夏人納款詔六路罷兵

狴犴空圉而不式滎河順紀喬嶽錫

符丹闕瓊臺屢下叢霄之蹕彤烏秀草共昭炎德之祥

永惟奕世之休罔匪自天之祐爰申禋祀比答真祺是

用測嘒籥以迎長備鑾輿而展采羽林綺列闢五門象

魏之嚴法駕星陳正六引旗章之度風祇清廟恭祓崇

壇稱王籍以奉盛載誕豐年之報潔宮蠶而修幣用端

永命之祈

案東都事畧是年二月詔行籍田三月皇后親蠶

景鍾道和樂之音

嘉禾薦大尊之齊純精昭格肸蠭潛通月璧星珠紛燎
煙而上徹雲車風馬歛飭馭以來臨肆均拜昨之禧式
霈滌瑕之宥誕揚渙號敷告多方可大赦天下於戲佑
烈祖以格皇天予惟克邁乃訓綏多福而熙純嘏邦其
永孚于休尚賴輔弼同寅官師勵翼共浹無為之化茂
隆累洽之圖

四年十一月十五日南郊赦文

案宋史徽宗宣和四年十一月庚午祀昊天上帝

帝于園丘大赦此書失載年號以赦文攷之知當在是年也

門下事上帝而懷多福

非禋祀不足以昭報本之誠紹大業以綏四方非升侑
不足以極奉先之孝朕荷三靈之儲祉奉列聖之詒謀
制治保邦克懋持盈之訓立政造事敢忘繼緒之思彌
文監虞夏之隆成憲復熙豐之舊百度惟正庶績其凝
士迪典常盡革淫朋之習民興淳樸式符道紀之昌人
僊志以丕欽天監誠而孚佑清臺觀象瑞占七政之齊
陽館頒常運協四時之敘雨澤應期而播潤河宗聽命
以回流農扈奏功黍稷嗣豐年之慶燕民効順封疆歸

輿地之圖

案九朝編年是年八月遼郭藥師高鳳以汴易二州來降

刑清而囹圄屢

空物遂而動植咸若驗諸福之畢至豈成功之敢居恭
念祭不欲䟽者禮之經物無以稱者天之德肇卜迎長
之旦聿修肆類之儀簠簋豆籩秩九州之嘉薦旂常畢
畢儼八衛之禋容庶邦底貢以駿奔多士秉文而顯相
稽魯人先事之義以前饗于太宮歌周王成命之詩肆
靈承于有昊衍我烈祖徧于羣神禮三獻而精意昭樂
六奏而靈祇下祥光旁燭景貺備臻修德錫符已應克

誠之享行慶施惠用均拜昨之禧嘉與萬方共膺純嘏
可大赦天下於戲百神受職知帝命之不違五福錫民
浹海隅而不冒尚賴忠良修輔文武協恭益堅勵翼之
心永底輯寧之治爰咨爾衆咸體朕懷

十一月十九日南郊赦文

案宋史宣和七年十一月丙戌祀昊天上帝于圓丘大赦

此書失載年號以日月及赦文攷之知當在是年也

門下皇武肇禋是創萬年之

業大明制禮爰釐二至之祠朕恭承休光永念丕緒衍
我烈祖實賴賢能之衆多格于皇天當由閭里之安樂

整飭百度撫綏兆民神明享持守之誠華夏樂憂勤之政屬者多稼徹燕雲之野齊氓安海岱之區遠人慕義而玉帛來川后畏威而波濤弭荷天休之震動莫不率從奉王業之艱難庶無罪悔是用誕舉豐年之報肅迎景至之期吉事有祥先致殊庭之薦大禮必簡併嚴清廟之承焜煌千乘萬騎之容終始七戒三齋之德迺潔誠于陽館遂祇事于泰壇風馬雲車仰百靈之睠顧星珠月璧知四海之清明共錫蕃禧用宏大賚可大赦天

下於戲薦馨香之治益承九廟垂裕之休施曠蕩之恩
更應一陽發生之候尚賴官師協德黎獻願忠共扶不
拔之基永篤無疆之慶

十一月二十二日南郊赦文

案宋史禮志高宗建炎二年駕至揚州築壇于江都

縣之東南是年十一月壬寅祀昊天上帝于圜丘大赦以太祖配此書失載年號以赦文攷之知當在是年也

門下觀會通以行典禮莫嚴定位以交神遠罪疾而弭
裁兵亦或因時而致禱朕承大統誕受多方屬外患之
相仍爰省方而臨幸念父母兄弟尚屈于敵疆惟甲冑

干戈再淹于歲序間寢闕溫清之奉在原深急難之情
信使屢馳久猶未報全師再遣坐待底寧復盜竊之無
良乘邊陲之多事馮陵州縣震擾民氓衣冠傾仆于道
塗耒耜荒殘于本業行者未知所適居者莫獲其安傷
閭里之疾苦則撫循之政尚愆閔行陣之勤勞則休息
之期猶遠每撫心而及此累當食以興嗟險阻艱難固
備嘗矣勞來還定孰安集之豈菲德之敢圖惟上穹之
悔禍永懷眷祐恭俟監臨雖丁多壘之辰適在當郊之

歲惟祭之或祈或報必大時物之宜而禮之有餘有豐
特視情文之稱是用講有虞東巡之制循建武二成之
規新卷冕以嚴恭逮胥徒而齊沐蓋高在上聰明皆自
于我民與善惟人治亂尤艱于天位既殫誠悃彌極戰
兢仰覆冒之何心詎存時怨況顛危之已甚寧忍我遺
疾呼反本而必聞精意默通而可動庶幾來假式燕多
難新命舊邦協幽明而竝貺此疆爾界一內外以均安
其數曠蕩之恩以廣旉鴻之施可大救天下於戲為斯

民而請命敢忘庶戮之無辜置大器于復安實冀昊天之所子尚賴六服羣辟三事大夫共宏恢復之功亟底

隆平之業

案宋史紹興十二年臣僚言南巡來三歲祀明堂而郊天大祀未舉來歲乞行之十三年

三月築園丘于臨安府行宮東城之外自是高宗凡六郊是年十一月庚申冬至合祀天地于園丘以太祖太宗並配大赦此下當別有赦文今無從攷補

十一月十日南郊赦文

案宋史紹興十六年十一月丙子合祀天地于園丘大赦此書

失載年號以赦文攷之知當在是年也

門下朕以菲躬獲承大寶賴三靈

之純佑宏濟艱難遵列聖之詒謀紹隆基緒于戈載戢

圉圉屢空田疇胥慶于豐穰華夏迄臻于綏靖繫神所
眷豈朕克堪念物皆本乎天宜謹精禋之報而德無加
于孝聿修並侑之儀豫飭司存肇新器用迎土圭之至
景即皇邸之齋居祇祓崇壇具嚴吉禮設陶匏而尚質
肅繭粟以貢誠籩豆靜嘉璧琮華潤淙盛蠲潔出于耕
藉之藏筍虞周環冠以景鍾之奏

案紹興十六年正月
親饗先農于東郊行

耕田禮五月作景鍾十月帝觀新
作禮器于射殿撞景鍾奏新樂

佩玉錚鳴而羣心肅

燎煙升舉而協氣充惟鉅典之備成敢蕃釐之專享旋

與端闕霈澤寰區可大赦天下於戲降祉發祥既荷博
臨之貺赦過宥罪誕昭數錫之恩更賴文武同寅股肱
修輔益思懋勉永底丕平

十一月十四日南郊赦文

案宋史紹興十九年十一月
壬辰合祀天地于園丘大赦

此書失載年號以赦文
攷之知當在是年也

門下父天母地報莫重于精禋

尊祖欽宗孝莫嚴于陟配朕祗承駿命纂紹丕圖每念
王業之難所其無逸矧茲神器之重必置諸安方撥亂
而興衰惟履信而思順上穹孚佑列聖垂休甘露降而

風雨時五穀熟而民人育

案宋史是年四月湖廣江西路建康府並降甘露七月頒

農書于郡邑

邊鄙不聳囹圄屢空顧以眇躬膺斯景貺是用

迎一陽之長至舉合祭之上儀先清廟以告虔衍我烈祖升園壇而肆類徧于羣神禮三獻而肸蠁通樂六變而風馬降祥光旁燭協氣橫流載惟熙事之成實得歡心之助上焉承祐豈予一人之敢專下以錫民惟爾萬方之並受於戲易薦上帝德崇而刑罰清詩美太平神寧而福祿下更賴忠良協贊内外交修共隆不拔之基

永底無為之治

十八日南郊赦文

案宋史紹興二十二年十一月戊申合祀天地于圓丘大赦此書但稱十

八日失載年月以十一月戊申推之為十八日知當在是年也

門下肅若古先鋪聞典

制蓋物本乎天而人本乎祖肇郊廟之明禋唯聖能饗

帝而孝能饗親展皇王之高致重循菲德獲履丕圖體

昊穹率育之仁每計安于黎庶嗣列聖好生之訓不輕

用于干戈陟降既孚邇遐咸乂九穀秀康年之畝五辰

澄宣夜之躔犴圉簡清疆陞整服祇荷博臨之眷敢忘

昭事之誠爰修三歲之彌文式歲一純之大報款真庭
而朝獻假太室以裸將遂造雲陽之宮以迎日至之景
合祛天地升侑祖宗踐豆薦芳見會通之行禮鳴鐘應
律寫和樂以成音佳氣焜于樵蒸美光充于陔陸高靈
竝貺熙事備成濟濟駿奔有同寅之多士穰穰山委可
專饗于蕃釐發肆恩言普施惠術可大赦天下於戲悖
將禮以秩祀儀模日月之昭受厚福以漸民號法風雷
之布更賴經邦公輔服采臣工永肩勵翼之衷共托隆

平之業

赦文

案宋史紹興二十五年十一月癸亥合祀天地于園丘大赦此書失載年月日以赦文攷之知當在

是年也

門下朕膺申命之休履中興之運惟發祥流慶之

既遠敢昧靈承念創業守文之為難每勤紹復儲精神而聽斷寶慈儉以化民荷穹昊之降康賴列聖之孚佑五兵不試寰宇阜安百穀用成刑罰清省靈芝連葉于

廟柱

案宋史是年五月太廟仁宗室柱生芝九莖

昭朝饗之孝祥嘉禾合穎

于甸郊備棗盛之潔薦諸福畢至豈朕敢當是用敦報

本反始之誠備飭躬施教之義維天神地祇之貴祭莫重于合祛維祖功宗德之隆孝尤先于升侑迺備乘輿之駕迺率侍祠之臣謁款殊庭裸將太室候黃鍾之初氣奉紫時之明禋禮三獻而有儀樂六變而告備神光竝見協氣橫流賚我思成既秩精能之祀配天其澤爰施汪濊之恩肆舉邦彝誕敷渙號可大赦天下於戲事上帝而懷多福益堅不已之純惠中國以綏四方宜有大賚之慶更賴英邦哲輔服采羣工共循宏遠之模永

保安強之治

赦文

案宋史紹興二十八年十一月己卯合祀天地于園丘大赦此書失載年月日以赦文攷之知當在

是年也

門下朕欽紹慶基肅遵昭式謂因天事天而因地

事地有丘澤之合祠惟以聖繼聖而以明繼明宜祖宗之並侑每躬三歲之祀茂輯百神之釐既益屬精更思圖又體覆載無私之德廓爾大公奉燕詒有永之謀丕釐庶政中外闔惲顯幽統和靈臺申偃伯之占砥路息鳴桴之警象載昭察甫田登成既膺孚佑之休當極濟

明之報是用躬飭鸞路涓熙紫壇敝帝籍以共榮盛哉

天歌以序金石

案宋史是年七月帝親製郊廟樂章

祇見恭館裸將太宮

遂迎景至之長載歲郊裡之吉大宗祈而宴饗嚴陟配

以宣延實俎焚膏旅令芳之嘉薦展詩應律鏘皦繹之

和聲精意洞乎九閼祥光襲乎五瑞清明邕矣事既底

于備成福履綏之美敢矜于專享誕受函蒙之祉普施

曠蕩之恩於戲馨香感于神明裒對一純之祐膏澤洽

乎黎庶並臻四極之熙尚賴輔弼同寅官師率職協亮

有邦之采永恆長世之圖

宋朝事實卷五

欽定四庫全書

宋朝事實卷六

宋 李攸 撰

廟制

元符三年詔曰藝祖順天應人肇造區夏太宗受命繼
代底定寰宇真宗以聖繼聖撫盈成之運奉太平之業
登岱告成文物典章于斯大備昔在神祖並稱千百世
不祧之廟恭惟仁宗皇帝躬天地之度以仁治天下在

位四十二年利澤之施丕冒山海早定大策授英宗以神器之重措宗廟于泰山之安功隆德厚孰可擬議英宗皇帝享國日淺未究施設奄棄萬國神宗皇帝以不世出之資慨然大有為于天下興學校隆經術勸農桑寬徭役禁暴以武理財以義凡政令法度有未當于理不便于時者莫不革而新之功業盛大何可勝紀羣臣引舊典數上徽號然自謙挹終抑而不居規模宏遠凜凜乎三代之風矣而廟祔之制殊未議所以尊崇之典

闕孰甚焉朕夙興夜寢所不敢忘也宜令禮官稽參商周
兩漢故事考定仁祖神宗廟制詳議以聞十一月權太常寺
奏少卿盛次仲等言恭惟仁宗皇帝承文明武定章聖之
後民庶物阜咸底安樂于是純以仁德在有天下明慎庶
獄哀矜無辜側席盡芻蕘之言臨軒空巖穴之士約侈玩
之好絕盤遊之娛恭儉之意無非為民夏羗猖狂款塞則
聽之儂賊背誕越疆則舍之舞干兩階卒自請吏百越之
長南夷之蠻聞至仁而來歸者梯航相屬日月所照霜露

所墜凡在覆幬無不丕冒草木之微昆蟲之細凡在生育
無不咸若肆享國四十二年至今田童野叟有聞遺老之
言述當時之事者猶春風時雨沐浴膏澤咸有生意而遺
澤猶在也至于蚤定大策授英廟以神器之重子孫相承
克享天心此又為宗社計立萬世之基也天祚有德是生
神考以卓然天縱之德輔以緝熙光明之學慨然遠覽三
墳五典之所載其詳既不可復見然猶得于伏羲神農黃
帝堯舜之心者乎窮則變變則通通則久故變而通之以

盡利鼓之舞之以盡神尊經造士而舉世知道德之意弛
力便民而終歲無煩擾之勞理財以義水旱有時而糴不
加貴禁暴以武兵革以時而民不加賦循名責實而政事
舉信賞必罰而勸沮行下至百工技巧咸有品式本末具
舉小大畢張勵精垂御十有九年典章文物炳然與三代
同風規模宏遠迄今四方向風蠻夷率服法令具而民不
犯器械精而兵不試惟見農安于野男耕而女桑商賈于
塗貫朽而粟腐內外晏如萬世永賴斯詒燕之效也譬如

日月往來四時迭運人見其歲功自成物物咸遂不知帝王造化之所在故曰惟天為大民無能名焉惟我神考實體之矣謹按禮記王制尚書咸有一德春秋穀梁傳荀卿之書皆言天子七廟則有天下事七世親盡則毀古今之通制也至于有功德者宗無常數故商有三宗周有二祧其來尚矣漢羣臣雜議論者不一惟大儒劉歆學術該洽謂宗無常數所以勸帝者之功德議者善之于是以高祖為太祖孝文為文太宗孝武為武世宗司徒掾班彪世推

儒宗亦以歆之議為得及光武立廟睢陽奉祀不改與

天無極

案此下似有闕文

于是三省表請付外施行有詔恭依

治平熙寧僖祖順祖祧遷議 治平四年十月二十四

日太常禮院奏僖祖文獻睿和皇帝文懿皇后神主祧

藏于西夾室今具合行典禮如右臣等謹按禮記檀弓

曰舍故而諱新注謂高祖之父當遷者也唐會要永徽

二年左僕射于志寧言依禮舍故而諱新故謂親盡之

祖今弘農府君神主上遷請依禮不諱從之又元和十

五年太常禮院言睿宗神主祧遷其忌日准禮合廢從之今僖祖皇帝神主祧遷伏請准禮不諱其忌日亦請依禮不諱詔恭依熙寧五年進呈兩制議僖祖廟事惟韓維異議神宗曰昨日韓維上來說廟事引文武之功起于后稷以謂因其起于后稷故推以配王安石曰經稱文武之功非稱后稷之功稱尊祖非稱尊有功言后稷非文武之功不能有天下不能有天下則不得行祭天之禮文武非后稷焉出故行祭天之禮則以后稷

配天乃所謂尊祖也上曰韓維又引王不待大以為亦待小國而王安石曰孟子自論湯文王不待大國然後有天下何關尊祖事且夏禹郊鯀禹非因鯀受封然後有天下前代固有不待有國而王天下者禹是也故揚雄以為禹以舜作土上曰鯀治水或有封國亦不可知安石曰若據書傳所載封于有夏氏曰有姒者禹也無預鯀事上曰尊祖不計有功此理無疑安石曰韓維言夾室在右自為尊位此尤無理今若子孫據正堂使祖

父在偏房乃以偏房為尊位豈為不悖又言遇禘祫即令僖祖東嚮如此即是以遷祖東嚮古無此理上問配天如何安石曰以禹郊鯀言之即是當郊僖祖推太祖孝心豈以郊僖祖為憾上令禮院集議馮京進呈議僖祖事安石曰此事欲決自聖裁如韓維議西夾室在堂之右似亦無嫌譬之人家若兒婦在正堂祖父居兩偏房乃謂兩偏房為尊計韓維家必不如此安排如何令宗廟乃如此韓維又言遇禘祫即僖祖東嚮既合東嚮

如何卻毀其廟遷其主所議止此兩事分明不可行上
曰韓維已屈服只是疑郊配合如何安石曰前代郊配
亦不一如商則祖契而宗湯周則祖文王而宗武王然
以理言之若尊僖祖為始祖即推以配天于禮為允先
王之制禮事亡如事存事死如事生故推僖祖以配天
必當祖宗神靈之意上曰宗祀明堂如何安石曰以古
禮言之太祖當宗祀今太祖與太宗共一世若迭配亦
于明堂事體為允上曰今明堂配先帝安石曰此乃是

誤引嚴父之說故以考配孝經所謂嚴父者以文王為
周公之父周公能述父事成父業得四海歡心各以職
來助明堂宗祀得嚴父之道故也若言宗祀則自前代
已有此禮上曰周公宗祀乃在成王之世成王以文王
為祖即明非以考配明堂也安石曰韓維本欲御史諫
官禮官集議朝廷既不從乃獨議如此初欲別為僖祖
立廟兩制笑其議改為今議上曰韓維是要求衆人為
助然且令禮官議無妨看他別有何說後數日進呈孫

固等議僖祖事上疑配天事安石曰萬物本乎天人本乎祖故王者配天以祖以祖非以功若以有功即鯀以無功殛死豈得謂之有功然夏后郊鯀即非有功可知也上疑禹因鯀之功安石曰鯀逆洪水禹順而道之是草也非因也上又疑僖祖非始祖安石曰僖祖非始祖誠是也僖祖與稷契事即不盡同即郊與不郊裁之聖心無所不可緣無害逆順之理故也若藏其主于夾室下附子孫即逆尊卑之序不可不改也上以為然乃下

固議令太常禮官併郊配議奏上因言姜嫄廟欲為僖
祖立別廟安石曰為祖立別廟自古無此理韓維初議
如此為人所笑故改議姜嫄所以有別廟者嫄稭人也
以先妣故盛其禮歌舞皆序于先祖之上不然即周不
為嚳廟而為嫄廟無說也進呈僖祖奏議上曰但議宗
廟事即士大夫紛紛蓋士大夫以禮文為己任故也馮
京曰士大夫皆以太祖不得東嚳為恨安石曰野人曰
父母何擇焉都邑之士則知尊祖矣陛下奉宗廟當擇

學士大夫之髦俊與之供祭祀蓋詩人稱文王奉璋哉
我髦士攸宜為此故也然則議宗廟事要合于士大夫
髦俊之心豈可以合野人為當上又曰本不合議配天
議者何以及此安石曰亦湏議了然本朝配天之禮亦
皆不合于禮經但此事未害逆順大倫有所未暇釐正
上曰今如何議安石曰宣祖見配感生帝欲改以僖祖
配上曰好安石曰此事湏中書門下議定乃降勅施行
馮京又言禮官以祧為疑安石曰此但改正僖祖順祖

合祧于禮亦無可嫌上曰莫是為忌諱無妨是年十月
太常禮院言奉聖旨詳定僖祖神主祧遷者竊以聖王
用禮固有因循逆順之大倫非敢違天而變古請奉僖
祖為太廟始祖遷順祖神主藏之夾室依禮不諱孟夏
祀感生帝以僖祖配詔恭依先是中書言萬物本乎祖
故先王廟祀之制有疏而無絕有遠而無遺商周之王
斷自稷契以下者非絕譽以上遺之以其自有本統承
之故也若無尊卑之位先後之序則子孫雖齊聖有功

不得以加其祖考天下萬世之通道也本朝自僖祖以上世次不可得而知則僖祖有廟與稷契宜無以異今毀其廟而藏其主于夾室替祖宗之尊而下附于子孫殆非所以順祖宗孝心事亡如事存之義求之前載雖或有之考合于經乃無成憲因情制禮實在聖時乞以所奏使下兩制詳議而擇取其當詔答曰廟祧之序蓋有典彝所以上承先王下法後世朕嗣大統獲奉宗祀而世次遷毀禮或未安討論經常屬我哲輔予以佐朕

不逮而仰稱祖宗追孝之心朕覽之矍然敢不祗服宜
依所請八年五月禮院言今年四月太廟禘祭排列神
位以僖祖居東嚮之位自順祖而下昭穆各以南北為
序自後如遇禘祫著為定禮詔恭依

司馬光議英宗祔廟僖祖神主當遷夾室准朝旨令待
制以上同議臣光于嘉祐八年仁宗祔廟之時已曾與
龍圖閣直學士盧士宗上言僖宗當遷夾室當時議臣
不以為然朝廷遂從衆議臣謹按王制稱天子七廟三

昭三穆與太祖之廟而七明太祖之外止有三昭三穆而已是以前代帝王于太祖未正東嚮之時大率所祀不過六世若僖祖于今日方議祧遷則是太祖之外更有四昭三穆與太祖之廟而八不合先王典禮難以施于後世臣愚以謂仁宗祔廟之時僖祖已當遷于夾室今英宗祔廟順祖亦合遷于夾室伏乞更賜詳擇知諫院范鎮議英宗即位祔仁宗主而遷僖祖及神宗即位復還僖祖而遷順祖鎮言太祖起宋州有天下與漢高

祖同僖祖不當復還乞下百官議不報及哲宗即位鎮
又言乞遷僖祖正太祖東嚮之位崇寧二年九月詔朕
寅奉宗祧丕式古訓廟室之制厥有常典於惟哲宗實
繼神考傳序正統十有六年升祔之初朕方恭默乃增
一室于七世之外遂成四穆于三昭之間考禮與書曾
靡有合比閱近疏特詔從臣并與禮官博盡衆見列奏
來上援據甚明謂本朝自僖祖至仁宗始備七世當英
宗祔廟神考聖學高明以義斷恩上祧順祖暨神考祔

廟又桃翼祖則哲宗祔廟父子相承當為一世桃遷之
序典禮可稽覽之惕然敢不敬聽其合行事件令禮部
太常寺詳議聞奏又詔有天下者事七世古之道也惟
我治朝祖功宗德聖賢之君六七作休烈之盛軼乎古
先尊為不祧者至于五宗遷毀之禮近及祖考永惟景
祐欽崇之詔已行而不敢渝暨我元符尊奉之文又隆
而不可殺博考諸儒之說詳求列辟之宜顧守經無以
見其全而適時當必通其變爰稽衆議肇作彛倫推恩

以稱情而為宜則禮以義起而無愧是用酌鄭氏四親之論取王肅九廟之規參合二家之言著為一代之典自我作古垂之將來庶安宗廟之靈以永邦家之福布告中外咸使聞知

太廟七室議 嘉祐八年八月乙酉以修太廟成命參知政事歐陽修告七室初廟室前楹狹隘每禘祫陳序昭穆南北不對左右祭器填委嘉祐親祫築土階張幄帟乃可行禮至是宗正丞趙觀因修廟室增廣檐陛如

親祫時詔從其請凡增廣二丈七尺丙戌太廟神主復歸于七室初太常禮院奏當以太祖太宗為一世神主祔廟則增一室詔兩制及待制以上與禮官議觀文殿學士孫抃等議謹按禮曰三昭三穆與太祖之廟而七書曰七世之廟可以觀德七世與昭穆云者據父子而言也若兄弟則昭穆同不得以世數數之矣商之祖丁之子曰陽甲曰盤庚曰小辛曰小乙四人皆有天下而商之廟有始祖有太祖太宗有中宗若以一君為世則

小乙之祭不及其太祖祖丁

案小乙之祭不及其太祖祖丁句宋史禮志作不及

其父蓋小乙為祖丁之子特以兄弟世次相及遂云為其太祖于稱名不順故宋史易之

是古之兄

弟相及昭穆同而不以世數數之明矣故晉之廟十一

室而六世唐之廟十一室而九世中宗睿宗之于高宗

敬宗文宗武宗之于穆宗

案唐敬宗文宗武宗皆穆宗之子敬宗原本作恭宗以避

翼祖諱宋史因之不改今從唐書改正

同居穆位國朝太祖為受命之祖

太宗為有功德之宗此萬世不遷者也故太祖之室太

宗稱孝弟真宗稱孝子大行皇帝稱孝孫而禘祫圖太

祖太宗同居昭位南嚮真宗居穆位北嚮蓋先朝稽用古禮而著之于祀典矣大行皇帝神主祔廟伏請增一室為八室以備天子之事七世之禮詔從之于是龍圖閣直學士兼侍讀盧士宗天章閣待制兼侍講司馬光議曰臣等謹按禮天子七廟三昭三穆與太祖之廟而七太祖之廟萬世不毀其餘昭穆親盡則毀示有終也自漢以來天子或起于布衣以受命之初太祖尚三昭三穆之初次故或祀四世或祀六世其太祖以上之主

雖屬尊于太祖親盡則遷故漢元帝之世太上廟主瘞
于寢園魏明帝之世處士廟主遷于園邑晉武帝祔廟
遷征西府君惠帝祔廟又遷豫章府君自是以下大抵
過六世則遷其神主蓋以太祖未正東嚮故止三昭三
穆已正東嚮之位則并三昭三穆為七世矣唐高祖初
立祀四世太宗增祀六世及太宗祔廟則遷弘農府君
神主于夾室高宗祔廟又遷宣帝神主于夾室皆祀六
世此前代之成法也惟明皇立九室祀八世事不經見

難可依據今若以太祖太宗為一世則大行皇帝祔廟之日僖祖親盡當遷于西夾室祀三昭三穆于先王典禮及近世之制無不符合太廟更不湏添展一室又詔拊等議議曰先王之禮自祖以下隆殺以兩故有天下者事七世有一國者事五世自漢以來諸儒傳禮者始有夏五廟商六廟之說其說出于不見商書伊尹之言而承用禮學之誤蓋自唐至周廟制不同而大抵皆七王制所謂三昭三穆與太祖廟而七者是也今議者疑

僖祖既非太祖又在三昭三穆之外以爲于禮當遷如此則是天子之尊而所事止于六世不稱先王制禮隆殺以兩之意且議者言僖祖當遷者以爲在三昭三穆之外則于三代之禮未嘗有如此而不遷者臣等以爲三代之禮亦未嘗有所立之廟出太祖之上者也後世之變既與三代不同則廟制亦不得不變而從時且自周以上所謂太祖亦非始受命之王特始封之君而已今僖祖雖非始封之君要爲立廟之始祖方廟數未過

七世之時遂毀其廟遷其主考三代之禮亦未嘗有如此者也漢魏及唐一時之議恐未合先王制禮之意臣等竊以為存僖祖之室以備七世之數合于經傳七世之明文而亦不失先王之禮意詔又從之

太廟戟門 太常禮院言天子宗廟皆有常制今太廟之南門立戟即廟正門也又有外牆櫺星門即漢時所謂櫺垣乃廟之外門也昨新建面西牆門原在通衢以止車馬之過廟者其臣僚下馬宜勿禁從之初知宗正

承趙恭和言今廟壩短而去民居近非所以嚴宗廟請別為復牆以甃累之故又設面西之門然而非制也

滁州并州澶州三宗神御殿 仁宗謂輔臣曰朕覽自古帝王凡起義及立功之地皆崇建浮圖以旌示後人如唐太宗之詔是也恭惟太祖擒皇甫暉于滁州是受命之端也太宗取劉繼元于并州是太平之統也真宗歸契丹于澶州是偃武之信也功業若此而神御缺然是朕不能顯揚祖宗之盛美也今于三州因其舊寺建

殿以奉安神御滁州曰端命并州曰統平澶州曰信武
神御告遷上親奠辭及太宗神御至并州是歲四月二
十二日也上謂輔臣曰朕閱平晉記所載太平興國四
年親征至太原城下亦此日也事之相去七十有五年
案宋史滁并澶三州神御殿建在神宗皇祐五年自太
平興國四年至是年凡七十五年原本誤作十有五年
今改正而日月符合如此何其異也宰相龐籍等曰陛下
孝德感通故符合如此請付其事史館

列聖神御殿 咸平初真宗始令供奉僧元藹寫太宗

聖容于啓聖後院玉清昭應宮范金以肖祖宗像餘多塑像其殿名在京奉先禪院曰慶基者奉宣祖在太平

興國寺曰開先者奉太祖

案宋史開先作開元與此互異

在玉清昭應

宮曰二聖者奉太祖太宗在啓聖院曰永隆者奉太宗在玉清昭應宮曰安聖在景靈宮曰奉真在慈孝寺曰

崇真在萬壽觀曰延聖在崇先觀曰永崇者並奉真宗

在景靈宮曰孝嚴者奉仁宗曰英德者奉英宗而外郡

在揚州建隆寺曰章武在西京應天院曰興先在滁州

曰端命者並奉太祖在西京應天院曰常華在太原府
曰統平者並奉太宗在西京應天院曰昭孝在澶州曰
信武在華陰雲臺觀曰集真者並奉真宗又鳳翔太平
宮有祖宗神御殿南京鴻慶宮有三聖神御殿西京永
安縣會聖宮有五聖神御殿今京師定力院有太祖御
容諸后影殿在京奉先禪院曰重徽者奉明德太后章
穆皇后在慈孝寺曰章德者奉章獻太后在景靈宮曰
廣孝者奉章懿太后在萬壽觀曰廣愛者奉章惠太后

又曰神御殿古原廟也以奉安先朝之御容宣祖昭憲
皇后于資福寺慶基殿太祖神御之殿七太平興國寺
開先殿景靈宮應天禪院西院南京鴻慶宮永安縣會
聖宮揚州建隆寺章武殿滁州大慶寺端命殿太宗神
御之殿七啓聖禪院壽寧堂景福殿鳳翔上清太平宮
并州崇聖寺統平殿及西院鴻慶宮會聖宮真宗神御
之殿十有四景靈宮奉真殿玉清昭應宮安聖殿洪福
院壽寧堂福聖殿崇先觀永崇殿萬壽觀延聖殿澶州

信武殿西京崇福宮保祥殿華州雲臺觀集真殿及西
院鴻慶宮會聖宮鳳翔太平宮仁宗英宗神宗哲宗四
朝神御于景靈宮廣孝殿應天院章獻明肅皇后于慈
孝寺章德殿章懿皇后于景靈宮廣孝殿明德章穆二
后于普安院重徽殿章惠太后于萬壽觀廣慶殿紹興
十五年秋復營建神御殿于崇政殿之東朔望節序帝
后生辰皇帝皆親酌獻行香用家人禮其殿名徽宗曰
承元欽宗曰端慶高宗曰皇德孝宗曰系隆光宗曰美

明寧宗曰垂光理宗曰章熙度宗曰昭光

案此條末有光寧理度四

朝神御殿名與宋史禮志畧同當是後人增入非李攸原本

廣親宅神御殿

嘉祐三年罷修睦親宅祖宗神御殿

初翰林學士歐陽修言神御非人臣私家之禮若援廣親宅例當得興置則是沿襲非禮之事詔送兩制臺諫禮官詳定上言漢韋玄成奏議春秋之義父不祭于支庶之宅君不祭于臣僕之家王不祭于諸侯其後遂罷郡國廟今睦親宅所建神御殿不合典禮悉宜罷時上

以廣親宅置已久不欲毀之

案此下似有闕文

范鎮乞罷修并州神御殿

鎮言竊聞并州素無火災

自建神御殿未幾而輒火災天意若告陛下祖宗御容
非郡國所宜奉安近日又聞下并州復加崇建是徒事
土木以重困民力非以答天意也自太宗皇帝下并州
距今七十七年故城父老不入新城陛下宜寬其賦輸
緩其徭役以除其患使河東之民不忘太宗皇帝之德
則陛下孝思豈特建一神御殿之比哉伏惟上觀天意

下顧人心特賜停罷臣不勝區區之愚

景靈西宮記 臣謹按景靈宮實始大中祥符以奉祠
聖祖逮天聖初乃易其旁之萬壽殿以為真宗館御之
所治平建仁宗之殿曰孝嚴熙寧建英宗之殿曰英德
而宣祖藝祖太宗之殿曰慶基曰開先曰永隆母后之
殿曰隆福重徽章德廣孝皆舊寓于佛老之祠布在都
邑與夫郊野之外歲時奠謁或不克躬行而清蹕所臨
動涉塗巷百工執事疲于奔走陟降跛倚而不恭殆非

所以致齋莊之誠廣孝欽之本也神宗天錫聖智超然
遠覽功成治定之際乃詔有司度宮之東西建六殿為
原廟奉祖宗之靈設以昭穆之次列于左右又為別殿
五于其北以奉母后其經營締構規畫程度靡不素定
按圖即工成不期月觀者駭異以謂非造化融結孰能
若是之壯麗神速也又以宣祖潛真隱耀實基王迹歷
數所鍾自我流澤故名其殿曰天元藝祖膺命造邦撥
亂反正兵不再試五服來享故曰皇武太宗親執晉俘

混一區夏覆載之內莫不嚮方故曰大定真宗登封告
成文物鼎盛珍符上瑞應圖合牒故曰熙文仁宗德教
善政康濟天下涵養覆露四十二年納斯民于仁壽之
域故曰美成英宗誕膺景命以紹文祖天人和同遠邇

綏靖故曰治隆

宋龐元英文昌雜錄云景靈宮神御殿成榜名皆上親製宣祖曰天元后殿白

太始太祖曰皇武后殿曰儼極太宗曰大定后殿曰煇極真宗曰熙文后殿曰衍慶仁宗曰美成后殿曰繼仁是記于五后殿名皆未之及事辭稱情名實無爽雲漢昭晰揭諸門

閎四方措紳傳誦于今不絕今皇帝踐阼之七月哲宗

復土泰陵議廣原廟于顯承殿之左一日顧謂輔臣曰
神考盛德大業越冠古今而原廟之制實始元豐惟顯
承僻處一隅日迫廛市無以稱崇報之重宜改營新宮
于馳道之西奉神考為館御之首詔示萬世尊異之意
羣臣踴躍附合為一退而表請其事詔曰恭依曲士腐
儒有以為不當遷者皇帝持其說益堅卒破浮議計不
中卻無有內外若臣若子皆延頸企踵知皇帝之繼志
述事如其篤且至也恭惟神宗皇帝聖神文武有不

世出之資仁孝勤儉著無能名之德內無聲色便嬖之
惑外無游宴玩好之累正心修身以先天下而奮然大
有為于世引見多士無間疎遠日昃不倦省閱幾務無
憚寒暑夜分不寐孜孜焉以招徠俊乂綜覈名實詢求
民瘼修飭治具故興學校擇師儒建三舍崇經術以養
人材發倉廩時賑貸募阜隸絕繇役以寬民力修水土
之政以敦本業而盡地利嚴保伍之法以察姦宄而寓
軍令宗子疎屬裁祿秩之濫而誘掖以宮學禁衛冗兵

考尺籍之實而銷併其名額重祿責吏以杜苞苴請託之私限員入流以懲胥徒仕進之濫理財賦以待邦國之用修武衛以固封疆之守凡可舉之事世以為難濟而不敢建者必為可革之弊衆之所甚願而不能改者必革有勞者必賞有罪者必罰號令風采凜然更新方是時士以緣飾表彰盜名吏以便文苟偷玩令積習既久寢以成風在廷之臣議論蠡起挾衆尚異更訕迭毀而不能惑乘機伺隙危言巧中而不能搖固守而力行

之沛然若決江河莫之能禦焦勞惻怛夙夜以之一時
同事之人聚精會神叶謀并力以趨上之所嚮而上之
所措縱橫泛應雖匠石之斲輪庖丁之解牛不足以喻
事為之制曲為之防典章區式纖悉備具乃至尚方武
庫之兵犀利堅勁期門羽林之士簡鍊精銳皆昔者之
所未有外則郡縣五溪授以冠帶開拓洮隴建之旌節
嶺梅絕域重譯請吏天地順紀風雨以時年穀屢登閭
里安悅英聲茂實充塞宇宙非至神大智誰能與于此

手中更元祐之變政之已改者人必病之已廢者人必思之然後益知其所設為良法善政雖偏言橫議亦莫之能易也今皇帝睿哲溫恭躬有聖質上帝眷顧駿命所集孝悌慈仁聞于海內遠識獨見明並日月沈幾剛斷堅若金石固足以紹庭緒業克成厥功然猶兢兢業業恭慎約戒毀臺榭卻珠珍罷土木不急之役而必以繕治太室建原廟為先既崇飭太宮以為斯宮之首遂奉宗祏上配烈祖世世獻享不遷不毀以為郊祀社稷

並列無窮致孝寧神之道可謂盡矣蓋西宮之地東與
故宮相直其棟宇之制供張之具一視故宮無有損益
大明之南有門曰燕昌北有殿曰欽儀寶母后之所御
也西則為寶慶殿以奉哲宗而南有門曰世德東則有
皇帝齋祓之館門曰昭德殿曰潔誠庖廚次舍各以其
序凡為屋六百四十區經始于元符三年十月之甲子
案東都事略及宋史建景靈西宮在元
符三年八月據此在十月與各書互異功不累歲役不
告勞行者不聞斧斤之聲居者不見追胥之擾而崇墉

廣厦屹然特起于端門百步之外象魏之下俯視二宮
樓觀崢嶸高切辰極金碧焜耀上薄光景都人士女與
夫要荒廣莫之來庭者肩摩足接卻立跂望排衆爭前
以快先覩歡欣歎悅洋溢道路非皇帝睿哲至誠出于
天性而不怵于卑近之說又何以臻此哉周之文武世
有明德以儀刑于天下成王率時昭考以緝熙于純嘏
故鳧鷖之詩言太平之君子能持盈守成神祇祖考安
樂之也其詩之始曰福祿來成終曰無有後艱皇帝嗣

宅神器祇率天下不愆不忘乃作斯宮以顯異先烈是似是續以追配乎前人方之成王何慊之有宰臣姓名

謹記

案此所云宰臣姓名未著何人據宋史元符三年十月韓忠彥為尚書左僕射兼門下侍郎曾布為

尚書右僕射兼中書侍郎又考陳振孫書錄解題云曾紆字公衮布之子建中靖國中布在相位奉詔撰景靈

西宮碑紆之筆也

復廢后制 景祐二年廢皇后郭氏薨詔復后號制曰

生而有貴秩于朝歿則申卹典于第矧蚤嬪于天極而奄謝于人寰不舉徽章曷旌遺躅故金庭教主沖靜元

師郭氏鍾層沙之慶分寶婺之輝動鑒圖史之規居服
組紉之事自玉衣叶兆金屋承榮夙施輔佐之勤益懋
閑和之則而乃遺情物表探味淵宗獨抗出塵之心遂
厭塗椒之地靈期遽迫朝露易晞良增悼往之懷載厚
飾終之典嗚呼柔儀永隔內範如存躡三景之蹤倏同
于萬化應四星之象復正于尊名芳魂有知歆我渥命
可特追冊為皇后停謚冊祔廟之禮其鹵簿儀物皆用
孝章皇后故事

溫成后祔廟議

原註石揚休上言
封香書名事附

溫成皇后神主祔

新廟皆以兩制攝獻官端明殿學士楊察攝太尉殿中
侍御史趙抃監察吳充監禮上又遣內臣臨視祭事內
出圭瓚以灌鬯充言于察曰禮上親享太廟則用圭瓚
若有司攝事則用璋瓚今使有司祭溫成廟而用圭瓚
是薄于太廟而厚于姬妾也其于聖德虧損不細請奏
易之察有難色曰日已暮矣明日行事言之何及而內
臣視祭者已聞之密以上聞詔即改用璋瓚

崇宋史吳
充傳云張

貴妃薨治喪越式判式王洙命吏以印紙行文書不令同僚知充移開封治吏罪忤執政意出知高郵軍不載請奏易圭瓚事

此書足補其闕

天章閣待制何郯奏曰臣伏見故貴妃

張氏自始沒贈后仍于墳所置廟不稱制度人言紛紜譏議至今不已稽其本末其有由然夫國有嬪妃蓋是常制必有賢德乃可備位蓋聞張氏之存也諫官王贇倡始建議策進加位因結託以固恩寵廟室之設並行定數前代之建別廟皆是不經張氏之歿也禮官王洙專用失禮講成廟議不守舊章敗亂典法二人者不正


之心深可誅也況開始謀葬之時禮臣按故事上議惟當于墓所置祠室本無立廟之說而王洙不顧歸過于上與當時執政合力務為將迎寢長其事以成黷禮之失春秋載隱公考仲子之宮初獻六羽蓋仲子非嫡而立廟獻舞故聖人譏之張氏亦非嫡又母后在宮而追冊后號仍建廟焉是尤不可也若遂而不改其招萬世之譏固無窮矣今欲正其失莫若改廟名為祠室歲時祀享不差祠官但委中官或內人掌之如此則其事初

為姦臣所誤而改之則過在下而不累聖德矣臣近累
為祠官親見禮物黷亂所不忍視故敢上縷陳述伏望
聖慈下有司速更之則足以追贖前失上頗重其言雖
不盡行然頗損其儀舊制每有祠祭封香稱臣書名至
是祀溫成廟內出封香亦稱臣書名知制誥石揚休上
言曰溫成本陛下妃妾不當稱臣此乃太廟之制有司
不以時聞致有此失上曰朕見諸廟封香一例進來所
以各為書名以表事宗廟之恭豈可溫成之廟亦稱臣

蓋失在有司非卿言朕無由知即命改正

案宋史溫成皇后祔廟時

吳充知太常禮院石揚休以刑部員外郎知制誥同判太常寺各詳見本傳此書但云吳充監禮知制誥石揚休不著太常官守似失之疎畧



宋朝事實卷六